

Prezento de la kandidatoj por la nova estraro

Kiel jam anoncote, kadre de la 88a Germana Esperanto-Kongreso en Münster/Vestf. okazos elekto de nova estraro dum la membrokunveno de Germana Esperanto-Asocio (GEA).

La tuta ĝisnuna estraro rekandidatiĝas, ankaŭ kun la ĝisnunaj laborkampoj: d-ro Rudolf Fischer (prezidanto), Andreas Emmerich (vicprezidanto, dungitaro), Wolfgang Bohr (landaj ligoj, konsilantaro, Esperantista Migrado Aŭtuna), Andreas Diemel (trezoristo), Julia Hell (GEJ-representanto), Sebastian Kirf (varbmaterialo, retpaĝaro), Christof Krick (Esperanto-instruado, AGEI), d-ro Rainer Kurz (eksterlandaj rilatoj, gazetara reprezentanto). Aldone kandidatiĝos Felix Zesch (kursoj, Eŭropa laboro), vidu lian apartan sinprezenton. **(voko)**
www.esperanto.de/deb/vorstand/

Sinprezento

Felix Zesch
27, dungita esploristo
kaj konsilisto pri loĝistiko.



Konciza biografio

Naskiĝis en 1983 en Leipzig. Studis ekonomikon, informadikon kaj loĝistikon en Ilmenau, Karlsruhe kaj Grenoble.

Vivas ekde 2007 en Berlin kaj laboras tie en la esplora ero de mezgranda firmao, kiu produktas loĝistikajn komputilprogramojn kaj konsilservojn.

Interesiĝas ekstere de Esperantujo pri aikido kaj ŝako.

Pasinta aktiveco en la Movado

1999: Eklernis Esperanton per retroŝta koresponda kurso.

2000-2001: Redaktoro de la GEJ-membrogazeto **kune**.

2001-2005: Prezidanto de GEJ.

2005-2009: Komitatano A de GEJ ĉe TEJO.

ekde 2008: Estro de la Komisiono por Instruado kaj Novuloj de GEJ.

Ekde 2008: Regula organizado de semajnfinaj kursoj kaj instruado de Esperanto en Berlin.

Ekde 2010: Kasisto de la landaj ligoj de GEJ en Berlin kaj Brandenburg.

2011: Kandidatiĝo por estrarana posteno en GEA kaj prezidanteco de Esperanto-Ligo Berlin kaj Esperanto-Asocio Berlin-Brandenburgio.

Posteno en la estraro

En la estraro mi ŝatus antaŭenigi la Eŭropan laboron de GEA, prezentante la starpunkton de GEA al interesitaj eksteruloj kaj eblaj aliancinoj, kaj reprezentante GEA en la komisiono de la Eŭropa Esperanto-Unio. Krome mi ŝatus uzi miajn ĝisnunajn spertojn en la organizado de Esperanto-kursoj por helpi al interesitaj aktivuloj mem okazigi kursojn, kiel mi jam faris en GEJ. Krom la laboro en la GEA-estraro, mi sur loka kaj federacilanda nivelo en Berlin kaj Brandenburg ŝatus modernigi kaj pliallogigi la Esperantovivon. Kadre de mia tiea aktiveco, mi ankaŭ povas informi la membrojn kaj nemembrojn pri planoj kaj agadoj de GEA, aŭskulti kaj diskuti iliajn dezirojn kaj ideojn.

Alvoko al la Landaj Ligoj de Germana Esperanto-Asocio

Landaj ligoj havas i.a. la taskojn, organizi regionajn aranĝojn, precipe kursosemajnfinojn.

Por tio oni povas ricevi subvenciojn de Germana Esperanto-Asocio (GEA). Legu detalojn pri la diversaj ebloj en la reto: www.esperanto.de/gea/por_membroj/foerder.html

(Por aliri tiun paĝon la uzanto estas „Esperantisto“ kaj la kodovorto „Rotterdam“.)

Agnoskite senprofitcelaj Landaj Ligoj krome ricevas ĉiujare 15% de la

GEA-kotizojn en la koncerna federacia lando (stato: fino de la antaŭa jaro). Tamen la mono ne venas aŭtomate, sed devas esti petata de la trezoristo Andreas Diemel gea.tr@esperanto.de. Aldonu la kasraporton de la pasinta jaro kaj la buĝeton de la aktuala.

Membrokunveno de Landa Ligo povas okazi plej simple dum Germana Esperanto-Kongreso. Petu senpagan salonon de la Loka Kongresa Komitato. Krome Landa Ligo sendu konstante reprezentanton al la ĉiujara kunveno de la konsilantaro, kutime novembre en Herzberg – la Esperanto-urbo. **(voko)**

Denove kune: 2-a Junulara E-Semajno (JES) en Burg/Spreewald (veterana vidpunkto)

La 2-a JES okazis en Germanujo, sed proksime de Pollando, kiel intencite. La urbeto Burg en la Spree-arbaro havas magazenojn kaj bankojn, tiel ke eblas akiri monon kaj aĉeti la necesajn varojn – grave ne nur por la memzorgantoj. La bela vintra pejzaĝo logis al fotado, sed la temperaturoj ankaŭ instigis, resti en la ejo krom dum la neeviteblaj piediroj inter la diversaj konstruaĵoj.

Ke ekzistis granda salono por la vespera programo, grave kontribuis al la etoso: Ĝi servis kiel centra loko por spontaneaj renkontiĝoj. Diskoteko kaj trinkejo okazis tuj apude. Aliaj noktaj programoj kiel gufujo (teejo), noktaj filmoj kaj karaokoo ne bezonas pli ol mallongan mension, ĉar ili jam iĝis la normo.

Daŭre ne videblis multa progreso en la organizado de iu tema programo, kiu estas unika kaj invitas al fakprelegoj kaj kontroversaj diskutoj. La distra programo estis sufiĉe riĉa. Krom diversaj lingvokursoj, kiuj por esperantlingva publiko estas nenio nova, kaj ekskurso al Cottbus, indas substreki la valoron de la novula programo. La peno, speciale prizorgi komencantojn kaj partoprenantojn, kiuj venis la unuan fojon al granda Esperanto-renkontiĝo, rikoltis multan pozitivan eĥon. Espereble tio iomete silentigos la memdubojn pri „fermita rondo Esperantujo“, kiujn eblas aŭdi en teoriaj diskutoj.

La vasta kultura parto de la programo estintus deca por tiaspeca festivalo. Konataj artistoj kun vigla muziko kiel Kim J. Henriksen, La Perdita Generacio aŭ La Pafklik' same aperis sur la

scenejo kiel tiuj kun trankvilaj stiloj kiel Gijom Armide, Johannes Mueller, Lena kaj Ŝenja Wilke, La Kuracistoj kaj Inicialoj DC. Krome prezentiĝis kvar grupoj kun neesperantlingva repertuaro, nome The ModStreets, The Heroine Whores, 42 kaj ChamaleoTon. Ili ĉiuj tamen havas personajn ligojn al Esperanto-aktivuloj. Precipe 42 povos furori en aliaj Esperanto-aranĝoj, se ili kantos en Esperanto. Diversaj teatraĵoj de ensemblo el Ukrainujo, kvizo kaj marmeladuma sesio (muzikado de grupo kunmetita surloke) kompletigis la bildon.

La silvestra balo iĝis kulmino de la aranĝo. Ke orienta kaj okcidenta Eŭropo denove festis kune, aparte kontribuis al tio. Sed ankaŭ laŭ la aĝo ne estis disigo: Duono de la partoprenantaro troviĝis jam ekster la junulaj jaroj.

Entute la 2-a JES estis sukceso. Laŭ la kvanto de partoprenantoj, iĝis la plej granda aranĝo dum silvestro en Germanujo ekde 2003/04. Krome laŭ persona impreso la etoso ne plu estis tiom bona ekde 2001/02. La reagoj de la publiko pensigas, ke Germanoj kaj Poloj ne plu iros apartajn vojojn per la Internacia

Seminario kaj la Ago-Semajno, sed tiel daŭrigos.

La unuaj paŝoj estas faritaj. Restas por prilabori tri ĉefaj punktoj: Unue necesas esplori kial el pli ol 300 aliĝintoj ĉirkaŭ 50 ne venis. Ĉu ekzemple pro problemoj akiri vizon? Due indas meti okulon al tio, ke malmultaj Poloj venis al Germanujo (vidu la apartajn statistikojn). Komuna projekto reflektiĝu en granda grupo el ambaŭ landoj. Tria renkontiĝo finiĝu la 3an de januaro, ne unu tagon antaŭe kiel ĉi-foje.

Gunnar Fischer

Statistiko:

252 partoprenintoj el 27 landoj, ekster Eŭropo (po unu persono): Brazilo, Israelo, Japanujo, Sud-Koreujo.

Laŭ kvanto, la plej multaj homoj venis el... Germanujo 84, Ukrainujo 29, Rusujo 24, Francujo 19, Pollando 17, Nederlando 16, Britujo 14.

Laŭ la aĝo 128 personoj havis inter 4 kaj 27 jarojn, el ili 12 estis 27-jaraĝaj.

Inter la partoprenintoj el Germanujo, 44 havis maksimume 27 jarojn, 6 el ili ekzakte 27.



Koncerto de Lena kun Ŝenja, prezento de la nova KD „Tra la sonĝoj“. Foto: Ivo Miesen